



ЎЗБЕКИСТОН КАСАБА УЮШМАЛАРИ ФЕДЕРАЦИЯСИ ХОРАЗМ ВИЛОЯТИ ҲОКИМЛИГИ МАСЪУЛЛАРИ, КЕНГ ЖАМОАТЧИЛИК ВАКИЛЛАРИ, ЗИЁЛИЛАР, УСТОЗ ВА МУРАББИЙЛАР, НУРОНИЙЛАР, КАСАБА УЮШМАЛАРИ ВА МАҲАЛЛА ФАОЛЛАРИ, ОТА-ОНАЛАР ВА БОЛАЛАР ИШТИРОКИДА ҚЎШҚЎПИР ТУМАНИДА «ХУМО» ОРОМГОҲИ ФОЙДАЛАНИШГА ТОПШИРИЛДИ.

Тадбирда сўзга чиққанлар юртимизда амалга оширилаётган изчил ислохотларнинг аҳамияти, ёшлар, хотин-қизлар, нурунийлар ва эҳтиёжманд оилаларга яратилаётган шарт-шароитлар, хусусан, ёш авлод камолоти, бахту саодати йўлидаги саъй-ҳаракатлар ҳақида тўхталдилар. Ушбу оромгоҳ нафақат Хоразм вилояти, балки Оролбўйи болаларини соғломлаштиришда муҳим ўрин тутадиган муаззам иншоот эканлиги таъкидланди.

Қайд этилганидек, жорий йилги мавсумда жами 1 428 та оромгоҳда 327 минг 454 нафар болани соғломлаштириш режалаштирилмоқда. Шундан Ўзбекистон касаба уюшмалари Федерацияси Болаларнинг дам олиши ва соғломлаштирилишини ташкил этиш департаменти тасарруфидаги 81 та болалар соғломлаштириш оромгоҳида 76 655 на-

фар бола соғломлаштирилади.

«Хумо» оромгоҳини Хоразм вилоятининг чекка ҳудудидида янгидан қуриш ташаббуси Президентимиз томонидан илгари сурилган эди. Ўзбекистон касаба уюшмалари Федерацияси бу хайри ташаббусни қўллаб-қувватлаб, қисқа фурсатларда муҳташам бинони халқимизга тўхфа этди.

Миллий ва замонавий меъморчилик анъаналари уйғунлашган ушбу иншоотни ўз муддатида болажонларга тўхфа қилиш учун «Чинобод қурилиш» хусусий корхонасининг қўли гул қурувчилари фидокорона меҳнат қилдилар.

Тантанали очилиш маросимидан сўнг меҳмонлар оромгоҳдаги шароитлар билан яқиндан танишдилар. 5,8 гектар майдонда 45 миллиард сўм маблағ эвазига барпо этилган 200 уринли ушбу за-

монавий оромгоҳ мавсум давомида 1000 нафар болажонларнинг нафақат мароқли дам олишлари, балки уларнинг билим ва кўникмаларини ошириш, иқтидорларини юзага чиқариш, спорт ва санъат билан шуғулланишлари учун ҳам барча қулайликларга эга. Бу ерда амфитеатр, бассейн, ошхона, футбол майдони, шинам ётоқхона, тўғарақлар хоналари, кутубхона ва бошқалар болажонлар хизматида.

Айтиш жоизки, бу каби оромгоҳлар сони йил сайин ортмоқда. Жорий ёз мавсумида Хоразм вилояти бўйича жами 27 оромгоҳда 12 минг нафарга яқин болани соғломлаштириш белгиланган.

Муҳаббат ТҲРАБОЕВА
«ISHONCH»

БУГУНГИ СОНДА:

БУГУНГИ ЗИЁЛИЛАРНИНГ ЮРАГИ ЖАДИДЛАРНИКИ КАБИ ОФРИМАЯПТИ




**БУГУНГИ ЗИЁЛИЛАРНИНГ ЮРАГИ
ЖАДИДЛАРНИКИ КАБИ ОФРИМАЯПТИ**



«Ishonch»нинг
YouTubeдаги
саҳифасида
кўринг!

3



24

**СОАТ
ОНЛАЙН**

ёхуд
вақтимизни
қандай
сарфлаяпмиз?

4

Маҳмуд ТОИР,
Ўзбекистон
халқ шоири



НАЗМ

Президентимиз Шавкат Мирзиёевнинг Ўзбекистон Муслмонлар идораси раиси, муфтий, Шайх Нуриддин ҳожи Холиқназаров билан телефон орқали қилган суҳбатини тинглаб дилимдан ўтганлари

ЎЗБЕК ҲОЖИЛАРИ

*Хуш ният инсонни хушёр айлағай,
Ҳақни хушламоққа ҳумор айлағай,
Ҳаёт шукронасин такрор айлағай,
Ўзбек ҳожиларин янги аҳди бу!*

*Ўн беш минг ҳожининг кўкда билаги,
Ҳаққа ибодатдан яйрар юраги,
Ўттиз минг кафт ичра тинчлик тилаги,
Ўзбек ҳожиларин янги аҳди бу!*

*Омон яшасин деб ҳар бир пок инсон,
Тутиб турар еру осмонни Раҳмон.
Ҳамду сано айтар Ўзига шоён –
Ўзбек ҳожиларин мангу аҳди бу!*

*Райҳондан таралар ҳаёнинг иси,
Ислом – мўминларга Тангри тўхфаси,
Ҳидоятга тўлар умр саҳифаси,
Ўзбек ҳожиларин янги аҳди бу!*

*Макка-ю Мадина – азиз қадамжо,
Саломларга тўлмиш ул Каъбатулло,
Қалбларнинг роҳати, руҳларга сафо,
Ўзбек ҳожиларин дилда аҳди бу!*

*Ўн уч асрдирки, Ислом нур сочар,
Қуръон нури ила дилдан ғам қочар,
Икки оламда бахт эшигин очар,
Ўзбек ҳожиларин дилда аҳди бу!*

*Равзаи зағварда қойим турганлар,
Қаъба теғрасида гирён юрганлар,
Ўзидан Ватанин аъло кўрганлар,
Расулulloҳ пойи – муслим тахти бу!*

*Икки дил суҳбати – давр даъвати,
Юртбоши сўзлари – ақл қуввати,
Муфтий дил изҳори – Аллоҳ раҳмати,
Уққан ҳожиларнинг умрин шамси бу!*

*Шукрона ҳожилар дил сўзларидир,
Минода очилган қалб кўзларидир,
Гуноҳдан ювилган гул юзларидир,
Ўн беш минг ҳожининг асил аҳди бу!*

*Дилларнинг дарёси тинчликсиз тўлмас,
Аҳиллик бор жойда таназзул бўлмас,
Маҳалла гар тотув – оқибат ўлмас,
Ўзбек ҳожиларин дилда аҳди бу!*

*Яхшининг изида юрар иззати,
Ҳожилик – Роббимнинг улғў ҳиммати,
Эй Расул акрамнинг азиз уммати,
Ўзбек ҳожиларин қатъий аҳди бу!*

*Ҳожилар қўлида адаб кўзгуси,
Ҳеч қачон сўнмасин ибрат туйғуси,
Миллат ёшларининг бўлсин орзуси –
Ўзбек ҳожиларин янги аҳди бу!*

*Тарбия чироғин ёрқин ёқсинлар,
Тилдаги бол билан дилда оқсинлар,
Ватанга муҳаббат ила боқсинлар,
Ўзбек ҳожиларин янги аҳди бу!*

*Ҳайитлар муслимнинг муборак куну,
Яратган айламиш таборак уни!
Эй сиз – бу оламнинг аҳли мўмини,
Бир-бирин қўлламоқ банди бахти бу!*

*Юртнинг раҳнамоси Раҳмон деб яшар,
Халқим деганида дарёдек тошар,
Буни кўриб турар бор бани башар,
Янги Ўзбекистон янги бахти бу!*

*Ўн беш минг ҳожидан ўн беш минг нидо:
«Дунё тинчлигини асра, ё худо!»...
Бухорийлар қилган бу қутлуғ дуо,
Ҳар ўзбек қалбида қалққан шаҳди бу,
Янги Ўзбекистон янги аҳди бу!*

■ ХИСОБОТ-САЙЛОВ КОНФЕРЕНЦИЯСИ

ОЧИҚЛИК ВА ОШКОРАЛИК РУҲИДА



Барча ҳудудларда бўлгани каби Навоий вилоятида ҳам ҳисобот-сайловлар қизғин кечмоқда. Уларда ўтган беш йилда амалга оширилган ишларга муносабатлар билдирилмоқда.

Транспорт, йўл ва капитал қурилиш, қурилиш индустрияси ходимлари касаба уюшмаси Навоий вилояти кенгаши конференциясида дастлаб кенгаш раиси Нарғиза Юлдашеванинг ҳисоботи эшитилди.

Қайд этилганидек, ўтган беш йилликда меҳнатни муҳофаза қилиш соҳасида кенгаш ходимлари томонидан 320 та корхона, ташкилот, муассаса фаолияти ўрганилиб, амалий ёрдамлар кўрсатилди. Шу жараёнда 765 та камчилик аниқланди. Иш берувчиларга 28 та тақдимнома киритилиб, касаба уюшмалари аралашуви билан 750 та камчилик бартараф этилди.

Ишлаб чиқаришда жараҳат олган ходимлар ва боқувчисини йўқотган oilаларга ҳуқуқий маслаҳатлар берилиб, касаба уюшмалари аъзолари ҳуқуқларини ҳимоя қилиш мақсадида 7 марта судларда иштирок этилди. Ишчи-ҳодимларнинг бўш вақтларини мазмунли ўтказиш, уларни бой маданиятимиз ва тарихий меросимиз билан яқиндан таништириш мақсадида 7 минг 350 нафардан зиёд ходимларнинг театр, музей, кўрғазма заллари, кинотеатрларга ташрифи уюштирилди. Шунингдек, «Ўзбекистон бўйлаб саёҳат қил!» шиори остида ички ту-

ризмни янада ривожлантириш мақсадида иш берувчилар ва ҳомийлик маблағлари ҳисобидан қарийб 17 минг 350 нафардан зиёд ишчи-ҳодимлар ва уларнинг oilа аъзолари учун Хоразм, Самарқанд, Бухоро вилоятлари ва Тошкент шаҳрига бепул саёҳатлари ташкил этилди.

Конференцияда кенгашнинг ҳисобот давридаги фаолиятига қониқарли баҳо берилди, тафтиш комиссиясининг ҳисоботи тасдиқлаб олинди. Яширин овоз бериш натижаларига кўра Нарғиза Юлдашева кўпчилик овоз билан кенгаш раиси этиб қайта сайланди.

Тадбиркорлик, бизнес ва хизмат кўрсатиш соҳалари ходимлари касаба уюшмаси Навоий вилояти бирлашган кўмитасининг ҳисобот-сайлов конференцияси ҳам очиклик ва ошкоралик руҳида ўтди. Унда 35 нафар делегат иштирок этди.

Бирлашган кўмита раиси Тойир Йўлдашев маърузасида таъкидланганидек, ҳисобот даврида ишчи-ҳодимлар саломатлигига алоҳида эътибор қаратилди. 900 нафардан зиёд ишчи-ҳодимлар ижтимоий суғурта ва касаба уюшмалари маблағлари ҳисобидан санаторийларда дам олди-

рилди. Улардан 177 нафари имтиёзли, 21 нафари бепул йўлланмалар асосида саломатликларини тиклади. Нафақат ишчи-ҳодимлар, балки уларнинг фарзандлари ҳам ёзги мавсумда сўлим оромгоҳларда соғломлаштирилди. Корхона ва ташкилотлар жамоа шартномаларига ёшлар ва хотин-қизлар учун имтиёзлар кўзда тутилган алоҳида бўлимлар, Халқаро Меҳнат Ташкилотининг Ўзбекистон Республикаси томонидан ратификация қилинган конвенцияларига амал қилинишини таъминлашга қаратилган бандлар киритилди.

2020 йилда жамоа шартномаси орқали бир нафар ходимга сарфланган маблағ 3 млн. 200 минг сўмни ташкил этган бўлса, 2024 йилда бу кўрсаткич 6 млн. 500 минг сўмга етди. Кам таъминланган oilалар вакилларининг 540 нафарига 223 млн. сўмлик моддий ёрдам кўрсатилди. Эҳтиёжманд, боқувчисини йўқотган ишчи-ҳодимларнинг 1264 нафар фарзанди учун ўқув қуроллари харид қилинди.

Нодавлат сектордаги корхона ва ташкилотларда аъзолик афзалликлари бўйича тарғибот-ташвиқот ишлари олиб борилиб, 432 та корхонада ишловчи 25 минг 613 нафар ходим касаба уюшмаси ҳимоясига олинди.

Шунингдек, ходимлар ўртасида спортни оммалаштириш, бўш вақтларини мазмунли ўтказиш мақсадида кўплаб спорт мусобақалари ўтказилиб келинмоқда. Ишда жонбозлик кўрсатган фаол ходимлар юртимиз бўйлаб тарихий шаҳарларга саёҳатга юборилмоқда.

Ҳисоботни диққат билан тинглаган делегатлар олиб борилган ишларни қониқарли деб баҳолашди. Касаба уюшмаси кўмагини ҳар бир аъзо яхши ҳис қилаётганини, жамоа шартномасига ходимлар учун кўплаб имтиёзлар киритилганини эътироф этишди.

Сайловда Тадбиркорлик, бизнес ва хизмат кўрсатиш соҳалари ходимлари касаба уюшмаси Республика кенгашининг Навоий вилояти бўйича масъул ташкилотчиси, жамоатчилик асосида Навоий вилояти бирлашган кўмитаси раиси этиб Тойир Йўлдашев қайта сайланди.

Умид ХУДОЙҚУЛОВ
«ISHONCH»



СУЮНБОВЕВГА ИШОНЧ БИЛДИРИЛДИ

Таълим ва фан ходимлари касаба уюшмаси Сўх тумани бўлимаси кенгашининг ҳисобот-сайлов конференцияси бўлиб ўтди. Унда 33 нафар делегат иштирок этди.

Дастлаб кенгаш раиси Муҳаммаджон Суюнбоевнинг ўтган беш йил давомида амалга оширилган ишлар бўйича ҳисоботи тингланди.

Таъкидланганидек, аъзолар соғлигини мустаҳкамлаш, меҳнат ҳуқуқлари бузилишининг олдини олиш, тарихий шаҳарларга саёҳатлар уюштириш касаба уюшмасининг доимий диққат марказида бўлиб келди. Утган давр мобайнида жамоа шартномасига киритилган барча бандлар бажарилишига эришилди.

Делегатлар етакчи ва тафтиш комиссияси ҳисоботларини тинглаб, уларнинг фаолиятига қониқарли баҳо беришди. Яширин овоз бериш йўли билан ўтказилган сайловда улар кўрсатилган номзодлар орасидан Муҳаммаджон Суюнбоевга яна ишонч билдиришди.

Сўзга чиққанлар туман кенгаши тасарруфига 3 минг 757 нафар аъзо бирлашганини, уларни ҳар жиҳатдан қўллаб-қувватлаш етакчидан фидойилик талаб этишини, М.Суюнбоев ҳам аъзолар манфаати йўлида елиб-югурадиган серғайрат касабакўмлардан бўлиб, ўтган беш йил давомида аъзоларнинг суянчиғига айланганини эътироф этишди.

Кун тартибидан ўрин олган барча масалалар қўриб чиқилган конференцияда Ўзбекистон касаба уюшмалари Федерацияси Фарғона вилояти кенгаши раиси ўринбосари Лолаҳон Аҳмедова иштирок этиб, юртимизда касаба уюшмаларининг ташкил этилиши тарихи, унинг ишчи-ҳодимлар ҳаётидаги ўрни хусусида сўз юритди.

Жамшид ЭРГАШЕВ
«ISHONCH»

ЯНГИ РАИС САЙЛАНДИ

АГРОСАНОАТ МАЖМУИ ХОДИМЛАРИ КАСАБА УЮШМАСИ ШОВОТ ТУМАНИ КЕНГАШИНING ХИСОБОТ-САЙЛОВ КОНФЕРЕНЦИЯСИ ТАНҚИДИЙ-ТАҲЛИЛИЙ РУҲДА, ТАКЛИФ ВА ТАШАББУСЛАРГА БОЙ ТАРЗДА ЎТДИ.

Кенгаш раиси Х.Машарипов ҳисоботида қайд қилинганидек, сўнгги беш йилда асосий фаолият меҳнаткашларнинг ижтимоий-иқтисодий ҳуқуқ ва манфаатларини ҳимоя қилиш, муносиб меҳнат ҳамда дам олиш шароитларини яратиш, ҳуқуқий маданиятини оширишга қаратилди. 43 та касаба уюшмаси ташкилотида 12 073 нафар аъзо манфаатлари жамоа шартномалари орқали ифодаланди.

Ҳисобот даврида 323 та ариза келиб тушди. Шундан 125 таси ёзма, 198 таси оғзаки мурожаат бўлиб, барчаси белгиланган муддатларда қўриб чиқилди ва қаноатлантирилди. Касаба уюшмаси фаолларининг ҳуқуқий саводхонлигини, айниқса, корхона, ташкилот раҳбарларининг бу борадаги билимларини ошириш мақсадида ўқув-семинарлар ташкил этилди. Ташкилотлар ўртасида футбол, мини-футбол, волейбол, югуриш мусобақалари уюштирилди. Ходимлар ва уларнинг oilа аъзоларини соғломлаштириш мақсадида санаторийларга 182 та

имтиёзли, 7 та бепул йўлланма берилди. Ҳисоботда қилинган ишлар билан бир қаторда эътибордан четда қолган масалалар ҳақида ҳам сўз юритилди. Жумладан, жамоа шартномалари ихросини назорат қилиш, барча бандлари бажарилишини

таъминлашда камчиликлар бор. Меҳнатни муҳофаза қилиш чора-тадбирлари тўлиқ бажарилмаётир.

Эришилган ютуқлар ва йўл қўйилган камчиликлар асосида олдинда турган вазифаларга ҳам тўхтаб ўтилган, тафтиш комиссияси раисининг ахбороти тингланди. Мухокамаларда кенгаш фаолияти қониқарли деб топилди.

Кенгаш раисини сайлаш жараёнида уч нафар номзод таклиф қилинди. Яши-



Инсон учун иш жойидаги муҳит, ўзига нисбатан муносабат ва ишонч шунчалик муҳимки, бу ҳолат кўп жиҳатдан унинг яшашга бўлган қарашини ҳам белгилаб беради. Бухорода жорий йилнинг февраль-апрель ойларида ўтказилган ҳисобот-сайлов йиғилишлари ва конференциялари айнан шундай ишонч, бирдамлик ва ҳамжиҳатлик муҳитини янада чуқурроқ намоён этгани билан аҳамиятли бўлди.

ҲАҚИҚИЙ ЕТАКЧИ ҚАНДАЙ БЎЛИШИ КЕРАК?

Шу вақт оралиғида вилоят бўйлаб 2 минг 594 та касаба уюшмаси ташкилотида ҳисобот-сайловлар ўтказилиб, уларда 167 минг 705 нафар касаба уюшмаси аъзолари иштирок этди.

Бу гапги сайловларда бошланғич ташкилотлар сафи янги фикр эгалари ҳисобига бойигани рост. Сайланган раисларнинг 61,5 фоизи олий маълумотли, 72,2 фоизи 30-50 ёшли, 50,7 фоизи аёллардан ibорат. 402 нафари эса илк бор ушбу масъулиятли вазифани эгаллади. Умуман, ўтаётган ҳисобот-сайловлар фақат расмий жараён бўлиб қолмасдан, жонли муҳокама, холис таҳлил, келажакка ишонч билан қарашнинг ифодаси ҳам бўлмоқда.

Транспорт, йўл ва капитал қурилиш, қурилиш индустрияси ходимлари касаба уюшмаси вилоят кенгашининг ҳисобот-сайлов конференцияси

шаффофлик ва ишонч руҳида ўтди. Дастлаб кенгаш раиси Дилбар Комилова ҳисоботи тингланди. Унда сўнгги беш йилда амалга оширилган ишларнинг ҳаққоний таҳлили, жамоавий ҳаракат

натижалари ва келгусидаги йўл харитаси мужасам эди.

— Ўтган беш йил осон кечмади, — дейди Дилбар Комилова. — Пандемия синовидан ҳам ўтдик. Ҳамжиҳатликда барча мақсадларимизни амалга оширдик ва қатор натижаларга эришдик. Хусусан, сўнгги беш йилда вилоятдаги бошланғич ташкилотлар қарийб уч бараварга кўпайди, аъзолар сони эса 50 минг нафарга етди. Бу тизимга ишонч, аҳоли онгида касаба уюшмалари фаолиятига бўлган ижобий муносабатнинг натижасидир.

Яширин овоз бериш натижаларига кўра, Дилбар Комилова яна беш йил муддатга раис этиб сайланди. Бу нафақат ишонч, балки масъулият рамзи ҳам демакдир.

— Ҳақиқий етакчи — одамларни эшита оладиган, улар билан нафақат байрамларда, балки муаммолар пайтларда ҳам бирга бўладиган инсондир. Дилбар Комилова ана шундайлар сирасидан. У ҳар доим иш жойида, ходимлар орасида, уларнинг ташвишини эшитади, улар билан бирга-

ликда ечим топишга интилади. Биз унга ишонамиз, — дейди делегат Фурқат Султонов.

Конференцияда иштирокчилар касаба уюшмасининг келгуси беш йиллик фаолияти учун устувор вазифалар бўйича ҳам фикр алмашдилар. Ходимлар ҳуқуқларини ҳимоя қилиш, меҳнат муҳитини яхшилаш, касб соҳасини рағбатлантириш, ёш мутахассисларни қўллаб-қувватлаш асосий вазифа сифатида белгилаб олинди.

Худди шунингдек, Тадбиркорлик, бизнес ва хизмат кўрсатиш соҳалари ходимлари касаба уюшмаси Бухоро вилояти бирлашган кўмитасининг ҳисобот-сайлов конференцияси ҳам бўлиб ўтди.

35 нафар делегат иштирок этган конференцияда яширин овоз бериш тартибида янги кўмита раиси, шунингдек, юқори касаба уюшмалари органлари Қурултой ва конференцияларига делегатлар сайланди.

Дилдора ИБРОХИМОВА
«ISHONCH»

рин овоз бериш натижаларига кўра, Саида Атажанова кенгаш раислигига сайланди.

Кун тартибидagi барча масалалар қўриб чиқилиб, тегишли қарорлар қабул қилинган конференцияда Агросаноат мажмуи ходимлари касаба уюшмаси Республика кенгаши раиси ўринбосари Тўхтамурод Бозоров, кенгашнинг вилоят бўйича масъул ташкилотчиси Шавкат Сафарбоев иштирок этиб, касаба уюшмалари ҳаракатининг 120 йиллиги, кейинги йилларда амалга оширилаётган ишловларнинг аҳамияти, тармоқ касаба уюшмаси олдида турган долзарб вазифалар ҳақида сўз юритишди.

Муҳаббат ТўРАБОЕВА
«ISHONCH»



БУГУНГИ ЗИЁЛИЛАРНИНГ ЮРАГИ ЖАДИДЛАРНИКИ КАБИ ОҒРИМАЯПТИ

Ўзбекистон Республикаси Олий Мажлиси Сенати аъзоси, Самарқанд давлат университети ректори Рустам ХОЛМУРОДОВнинг «YUZMA YUZ +» лойиҳаси учун берган интервьюси

– Самарқандда бўлиб ўтган «Марказий Осиё – Европа Иттифоқи» биринчи саммитида мухтарам Президентимиз: «Самарқанддан туриб қаралганда дунё тарқоқ эмас, балки яхлит ва бўлинмас бўлиб кўринади», деган фикрни айтди. Сўхбатимизни ифтихор қилса арзийдиган, одамда ғурур уйғотадиган мана шу воқеалик, яъни саммит ҳақидаги таассуротларингиз билан бошласак.

– Ўзбекистон ҳудудида тарихи Самарқанд каби узоқ ўтмишга бориб тақаладиган бир нечта шаҳар бор. Унча-мунча мамлакатда бунақа қадимий ва навқирон гўшалар йўқ. Ушбу кентлар ўз шонли кечмиши билан нафақат ўзбек халқининг, балки минтақамизнинг, қолаверса, бутун туркий дунёнинг фахру ифтихори, ғурурига айланган, десам, муболаға бўлмайди.

Дарҳақиқат, сўнгги йилларда Президентимиз Шавкат Мирзиёевнинг ташаббуси ва саъй-ҳаракатлари билан ташқи сиёсатда инқилобий ўзгаришлар рўй берди. Буни ҳаммамиз кўриб ва билиб турибмиз. Масалага шу жиҳатдан ёндашганда, Самарқанддаги йирик анжуман – «Марказий Осиё – Европа Иттифоқи» биринчи саммити ҳам ўз-ўзидан бўлгани йўқ.

Айни чоғда, рўй-роқст тан олиш керакки, глобал сиёсатда минтақани яхлит сиёсий субъект сифатида эътироф этиш айнан Президентимиз фаолияти билан бевосита боғлиқ. Чунки у кишининг жонкуярликлари ва интилишлари самараси ўлароқ, кейинги 8 йилда минтақадаги ижтимоий-сиёсий вазият тубдан ўзгарди. Аввало, кўшнилари билан муносабатимиз илиқлашди. Орадаги гина-қудурат, тушунмовчиликлар барҳам топди.

Энг муҳими, бугун бир замонлар фақат орзу бўлган минтақа интеграцияси ҳақида жиддий гапирила бошланди. Самарқандда бўлиб ўтган йирик машварат ҳам бу фикримизни тасдиқлайди. Ўзбекистоннинг дунёга очилиши дунёни ҳам бизга очди, жаҳон бизни қайта кашф этгандай бўлди. Масалан, давлатимиз раҳбари мана шу тадбирдан сал олдин Франциянинг нуфузли мукофоти билан тақдирланди. Табиийки, бу ўз-ўзидан бўлгани йўқ. Демак, самимий мулоқотда гап кўп.

Келинг, шу ўринда аввалги ҳолатларни ҳам бир ёдга олайлик. Бир вақтлар кўшнилари билан муносабатларимиз қандай эди? Очигини айтиш керак, хавф туғдириши мумкин бўлган омиллар жуда кўп эди. Аллоҳга шукур, ҳозирги одилона сиёсат натижасида нафақат биргина Афғонистон, балки бошқа кўшниларибиз билан ҳам алоқаларимиз яхшиланди. Ўзаро борди-келди, савдо-сотиқ, умуман олганда, тарихий самимият қайта тикланди.

Самарқанд ўзининг уч минг йиллик ўтмиши давомида нималарни кўрмаган дейсиз?... Тарихдан бохабар одам бу кўхна кентнинг яна жаҳон эътиборига тушаётганидан ҳикмат ахтариш ва топиши тайин. Анжуманда Шавкат Мирзиёев айтган гаплар барчамизни ғурурлантирди.

Зеро, бу шаҳар ўз вақтида жаҳон маданияти, сиёсати ва айтиш мумкин бўлса, ҳарбий қудрати орбиталаридан бирининг маркази бўлган. Дунё халқлари, давлатлари айни меҳвар атрофида саф тизишган, ундан улгу олишган. У шуҳрати ва тарихий қудратига кўра, инсоният тамаддунига таъсир кўрсатган Рим ва Афина каби тарихий шаҳарлардан асло кам эмас.

Президентимизнинг Самарқанддан туриб, дунёга назар ташлаш ҳақидаги фикр-мулоҳазаси тарихий-фалсафий мантиққа эга. Бир замонлар Евроосиёдан Жанубий Осиёгача, Кавказдан то Ғарбий Осиёгача ва ҳатто Европага қадар таъсир қила олган буюк империяга бешик бўлган муқаддас заминдан туриб жаҳонга боқиш ва ҳулоса чиқариш учун бугунги нотинч замонамизда, албатта, маънавий зарурат бор.

Ҳақиқатан ҳам, бугун биз таҳликали бир даврда яшаяпмиз. Самарқанддаги йиғинда давлатларимизда ва умуман, дунёда тинчликни сақлаш, дўстлик, ҳамкорликни ривожлантириш руҳияти юқори бўлгани алоҳида аҳамиятга эга. Кўхна қитъа вакилларининг

мамлакатимиз ва унда олиб борилаётган ўзгаришлар бўйича билдирган фикрлари шу юртнинг бир фарзанди сифатида мени жуда қувонтирди.

Бир пайтлар Европа Иттифоқи ва Ўзбекистон ўртасида девор бор эди. Иқтисодий чекловлар, савдо бойкотлари ва маданий-сиёсий «беғоналаш» унинг асосини ташкил этарди. Бунинг эса ўзига хос сабаблари мавжуд эди. Болалар меҳнатидан фойдаланиш, мажбурий меҳнат, сиёсий ва диний эркинликлар ва бошқа омиллар шулар жумласидан ҳисобланарди. Президентимизнинг ташаббуси ва қатъий сиёсати туфайли уларнинг ҳаммаси қисқа фурсатда ўз меъёрига келтирилди ва буни дунё тан олди. Мана, эзгу саъй-ҳаракатларимиз натижасини кўряпмиз.

Ишончим комил, тadbир доирасида эришилган келишувлар ва имзоланган ҳужжатлар истиқболда Ўзбекистонимиз дунё ҳам-жамиятига янада дадил кириб боришига, пировардида халқимизнинг турмуш шароити янада яхшиланишига хизмат қилади.

– 2016 йилдан кейин илм-маърифатга муносабат ҳам тубдан ўзгарди. Бу соҳа ҳамиша Президентимизнинг алоҳида эътиборида бўляпти. Сўзимиз исботини яқинда педагогик кадрларни тайёрлаш бўйича қабул қилинган фармон мисолида яна бир бор кўрдик. Сиз ушбу жараёнларга бир олим, қолаверса, тажрибали мутахассис сифатида баҳо берсангиз...

– Афсуски, яқин ўтмишимизда таълим соҳасида ўйламасдан, шошма-шошарлик билан амалга оширилган ишлар оқибатида ёшларнинг билим олишига ва тарбиясига путур етди. Сўнгги 7-8 йил мобайнида эса, муқаддам йўл қўйилган ҳатолар тан олиниб, уларни тузатишга киришилди. Илм-фан, таълим, жумладан, мактабгача таълим йўналишида мисли кўрилмаган ишлар қилинди.

Одамга таскин берадиган жиҳати шуки, қисқа муддатда ижобий натижаларга эришдик. Масалан, мактабгача таълим қамровини деярли 80 фоизга етказдик. Ҳозир янги авлод тарбиячиларини тайёрлаяпмиз. Мактабларни 9+3 тизимдан 11 йиллик ҳолатига қайтардик. Олий таълим муассасаларини кўпайтирдик.

Тўғри, кўзланган чўққига бирдан чиқиб бўлмайди. Шунинг учун мақсадимиз сари секин-аста, зинама-зина чиқиб боряпмиз ва тўғри қилаяпмиз. Вақти-соати келиб, бу ўз мевасини беради, албатта.

«Педагог кадрлар тайёрлаш тизимини янада такомиллаштириш чора-тадбирлари тўғрисида»ги фармон ўз мазмун-моҳиятига кўра, олдингиларидан долзарброқ ва аҳамиятлироқдир. Бу ҳужжатда кўп масалалар қамраб олинган, хусусан, кириш қисмида ундан кўзланган мақсад қуйидагича баён этилган: «Мамлакатимизда педагог кадрлар тайёрлаш тизимини ягона ендошув асосида тубдан такомиллаштириш, мазкур йўналишда олий таълим дастурларини халқаро тажриба асосида трансформация қилиш, шунингдек, таълим соҳасида узвийлик ва узлуксизликни ҳамда илм-фан ва амалиёт уйғунлигини таъминлаш».

Лекин унинг мазмун-моҳиятини ва аҳамиятини ҳали кўпчилик тўлиқ англаб етмаяпти. Аслида мактаблардаги ҳар бир муаммо педагогик кадрларнинг билими, малакасига бевосита боғлиқ. Бу эса мутахассисларни тайёрлашдаги жараёнларнинг сифат ва савиясига бориб тақалладиган масала. Агар шу йўналишдаги институт ва университетларимиз яхши педагоглارни етиштириб берса, мактаблардаги муаммолар ўз-ўзидан ечилади. Чунки биз кутаётган мақсадни амалга оширадиганлар муаллимлардир. Уларни замон талаблари асосида тайёрлай олсак, соҳада жиддий ижобий натижаларга эришамиз.

Сўнгги йилларда Президент мактаблари, ихтисослаштирилган мактаблар очилди. Айни пайтда Президент мактабларининг биринчи қалдирғоч-

лари дунёнинг нуфузли олий таълим масканларида таҳсил олишмоқда. Албатта, бу «таълимнинг янги стандартлари» мезони нуқтаи назаридан қувонарли ҳодиса. Лекин мени бир нарса хавотирга солади. Биз соҳага янгиликлар киришти билан бирга, бу борада совет таълим тизими меросига ҳам бевосита ворислик қилаётгандаймиз. Масалан, бугун дунёда рақамлаштириш, технологиялар тез ривожланмоқда ва бу кўнлаб касбларга заруратни кескин инкор қилмоқда. Дейлик, биз ҳар йили аграр йўналишда минглаб мутахассислар етиштирамиз, аммо савол туғилади: иқтисодиёт, қишлоқ хўжалиги ва саноат технологиялашаётган бугунги даврда уларга қанчалик эҳтиёж бор? Таълим тизимини реал ҳаётга мослаш, яъни соҳани келажак учун керакли кадрлар етиштиришга йўналтириш вақти келмадимикан?

– Дунёда селекцион таълим деган тушунча бор. Европанинг қатор мамлакатларида болалар поғонама-поғона, қизиқиши ва қобилиятига қараб, гуманитар, техника, аниқ фанлар йўналишида сараланади. Биз ҳам шу йўлдан борсак, салмоқли ютуқларга эришишимиз шубҳасиз. Президентимиз таълим йўналишида бошлаган сиёсат айна мақсадни кўзлайди. Бунга мисол тариқасида Президент мактабларини келтириш мумкин.

Қолаверса, рақамли технологияга ёки ижодий йўналишга ихтисослаштирилган, физика, математика фанлари чуқурлаштириб ўқитиладиган таълим масканлари бор. Яъни биз ҳам бугун совет таълим тизими меросидан воз кечиб, соҳага дунё тажрибасидан ўтган самарадор усулларни жорий қилмоқдамиз.

– Олий таълим чиқараётган кадрларга эҳтиёж масаласи?..

– Тўғри, замона зайли билан айрим мутахассисларга талаб ўзгарди. Лекин бу ўша мутахассис керак эмаслигини англатмайди. Шунчаки биз уни иш билан таъминладиган тизимни унутдик. Айни пайтда юриспруденция, халқаро муносабатлар, молия-иқтисодиёт, бухгалтерия каби мутахассисликларнинг бозори чакқон. Кўпчилик ўзини шу соҳаларга уряпти. Аграр жаҳаҳага эса кўпчилик қизиқмай қўйди. Ваҳоланки, бир вақтлар ушбу йўналиш жуда жозибадор бўлган.

Хўш, соҳа нега бундай аҳволга тушди? Хабарингиз бор, ўтган асрнинг 90-йилларидан бошлаб, қишлоқ хўжалигини турли ўзанларга солиб қўрдик. Қолхоз, совхозларни тугатиб, ширкат хўжаликлари, фермер хўжаликлари, сув истеъмолчилари уюшмалари туздик. Бу ўз-ўзидан соҳадаги мувозанатни бузди. Масалан, мулкчилик шакли ўзгарди. Ер эгаси бўлган фермер агроном ёки қишлоқ хўжалиги бўйича мутахассисга эҳтиёжмис йўқ, дегандай бўлди ва хатолик шу ердан бошланди.

Ер майдонлари аксарият ҳолларда агротехника талабларидан умуман беҳабар кишилар қўлига тушиб қолди. Бугун оқибатини кўриб турибмиз. Шу боис бир пайтлар жуда шарафли саналган агроном, зоотехник каби мутахассисларнинг обрўси тушиб кетгандай бўлди. Бу, табиийки, таълим йўналишига ҳам таъсир кўрсатди. Ҳозир олий таълимга қабул балларини кузатсангиз, энг қули балл айнан аграр йўналишда «забт» этилаётганининг гувоҳи бўласиз. Билими ҳаминқадар талабалар ўқишини битириб, мутахассис сифатида иш бошлагач, ҳолатни тасаввур қилаверинг...

Аммо аниқ факт шундаки, қишлоқ хўжалиги соҳаси биз учун жуда муҳим. Мен «Ушбу соҳа бўйича мутахассисларга эҳтиёж камайди», деган гапларга қўшилмайман. Чунки олдимизда озик-овқат хавфсизлиги масаласи кўндаланг турибди. Яқин йилларда нуфусимиз 40 миллионга, 10-15 йилдан кейин 50 миллионга

етиши прогноз қилиняпти. Минтақада сув муаммоси пайдо бўляпти. Чўлланиш хавфи ҳам бор. Иқлим ўзгариб боряпти. Қишлоқ хўжалиги маҳсулотлари етиштиришда муаммолар кузатиляпти. Мана шундай оғир вазиятда бизга қишлоқ хўжалиги бўйича замонавий билимга эга ва тажрибали мутахассислар керак.

– Собиқ Иттифоқ даврида юртимиз олий ўқув юртларида хорижликлар ҳам таълим олишарди. Ҳозир ҳам шундай дейишга ҳақимиз борми? Ҳар қалай, тизим испоҳоти йўлидаги шаштимиз ёмон эмас. Мен олий таълимнинг аввалги нуфузини тиклаб, замонавий тажрибаларга интеграция қилиш вақти келмадимикан, демоқчиман. Масалан, исталган бирор хорижлик талабада нима учун Самарқанд давлат университетига келиб ўқиш орзуси бўлмаслиги керак?!

– Яқинда Истанбулда бўлдим. У ердаги университетнинг турк ислом маданияти бўлимига кирдим. Шу асно қадимги Самарқанд тарихини тош давридан бошлаб, XX асргача ёзган олим билан сўхбатлашдим ва менда бир қанча ҳақли саволлар пайдо бўлди.

Хўш, нима учун биз ўтмишни борица акс эттиришда XIX асрдан нарига ўтолмаяпмиз? Чунки тарих фанига илмий қарашларимиз ҳамон ўзгармаган. Ҳалигача совет тарихшунослигига оид манбалардан фойдаланиб, илмий иш қилибмиз. Бунинг энг асосий сабабларидан бири бизда асл манба билан ишлаш тажрибаси шаклланмаган.

Эътибор беринг, педагогика институти тарих муаллимини, университетларимиз эса тарих бўйича академик кадр олим, яъни соҳани тадқиқ қиладиган мутахассис тайёрлаши керак. Аммо у манбаларни ўқиёлмаса, қандай олим бўлади?! Файласуф бўлса-ю, фикрларини аниқ манбаларга асосланиб, шарҳлаб беролмаса ёки психология, социология бўйича манбалар билан ишлолмаса... Исломгача, исломдан кейинги давр, ўрта асрлар, қанча тарих бор... Биз шулар асосида бугунги кун ва келажакимизни тамсил этишимиз керак.

Менимча, таълим тизими, айниқса, академик жаҳаҳда нималарнидир ўзгартириш, эски чеклов ва табуларни бартараф этишимиз лозим. Олий таълим масканлари ўз фаолиятларини бир-бирини тақрорлайдиган эмас, тўлдирадиган асосда йўлга қўйиши зарур бўлади, назаримда. Нафақат тарих, гуманитар соҳа ҳисобланадиган бошқа фанлар, масалан, фалсафа йўналишида ҳам муаммоларимиз етарли.

– Адашмасам, 1990 йилларда олий таълим икки тизимга – бакалавр ва магистратура босқичига ажратилди. Ўтган 30 йилдан зиёдроқ вақт ичида бу қанчалик ўзини оқлади ёки оқламади? Бунга ҳам баҳо берилиши керак, менимча! Сиз ушбу тизим орқали кўзланган мақсадга нечоғлиқ яқинлашдик, деб ўйлайсиз?

– Тўғри, дунё тажрибасидан андоза олди. Лекин аслида бунга тайёр эмасдик. Беш йиллик таълимдан бакалавр ва магистратурага ўтиш шунчаки жўн иш эмас. Аслида бу йўналишга ўтишдан олдин қатор шартларни бажаришга тайёр бўлишимиз лозим эди.

Масалан, бозор олий даражадаги мутахассислар билан тўйинган бўлиши, таълим маданияти шаклланган, иқтисодий испоҳотлар самарадорлиги юқори бўлиши керак эди. Мулоҳазаларимни Ғарб мамлакатлари мисолида асослайдиган бўлсак, уларда икки босқичли таълимга ўтишнинг ўзига хос тарихи бор. Жамият кучли мутахассислар билан тўйинган. Яхши муҳандис, яхши агроном, яхши қурувчи кўп. Ҳаёт даражаси ҳам юқори босқичга кўтарилган. Натижада у аҳолида фақат кун кўриш учунгина эмас, балки ундан ҳам муҳимроқ, ма-

салан, ҳаётдаги ўз инсоний ўрнини чуқурроқ англаш ёки оддий уй бекаси фарзандлари тарбияси учун ҳам олий маълумотли бўлиш зарур, деган юқори талаблар шаклланиши ортидан ривожланган. Шунинг учун бу давлатлар таълимни икки босқичли қилишган. Биринчи босқич оммабоп бакалаврият, иккинчи босқич эса ҳақиқий илм йўлини танлайдиганлар учун мўлжалланган.

– Демак, биз буни бошидан нотўғри қилган бўлиб чиқарканмиз-да?..

– Кўпчилик дастлаб магистратурани олимлар тайёрлайдиган босқич, деб тушунди. Айрим кишилар ҳалигача шундай деб ўйлашади. Аслида магистратура иқтисодиётни, ижтимоий ҳаётни силжитадиган юқори малакали мутахассислар тайёрланадиган асосий таянч таълим йўналиши ҳисобланади. Аммо биз уни жозибадор қиллолмадик. Бундан ташқари, юқорида айтганимдек, бакалавр эмас, магистр ҳақиқий мутахассис саналади. Чет элда шундай. Уларнинг амалиётида бакалавр дипломи соҳибига тегишли комиссия аъзолари, масалан, «Сен заводда муҳандис бўлиб ишлашинг мумкин, лекин мана бу лавозимдан юқорига кўтарилса олмайсан», деб айтишади. Бизда эса унақа эмас. Бакалавр даражаси билан истаган лавозимни эгаллаш мумкин. Шу боис магистратуранинг у қадар юки йўқ.

Аслида бу хато қараш. Магистр бакалавр дипломига эга мутахассисдан ҳар тарафлама юқори поғонада туриши лозим. Жоиз бўлса, магистратура босқичида инглиз тилида дарс берайлик, шу тариқа янги ўзбек зиёлисини чиқарайлик.

Худого шукур, ҳатолар тузатилаётир. Магистратурага кириш талабларини ўзгартдик. Инсон омилини йўқ қилдик. Демак, аста-секин бўлса-да, яхши ўзгаришлар сари қадамлар ташланяпти.

– Юз йил олдин қадидлар маърифатли жамият қуриш ҳаракатида бўлишган. Лекин бу иш ўзларига қимматга тушган. Ҳозир жадидларга, илм-фанга муносабат тубдан ўзгарди. Давлат илм-маърифатни юз фоиз кўнлаб-қувватлапти. Халқ ҳам шунинг тарафдори. Бироқ, қани энди, ушандай жадидлар?... Шу савол менга мудом тинчлик бермайди. Назаримда, бу туйғу сизга ҳам бегона эмас...

– Дарҳақиқат, жадидларнинг энг катта мақсади — халқни хат-саводли, маърифатли қилиш эди. Улар одамларни рўшноликка чиқаришнинг бирдан-бир йўли шу, деб ҳисоблашган. Назаримда, ҳозирги зиёлининг юраги ўша жадидларникичалик оғримаяпти. Президентимиз олиб бораётган сиёсатни яхши англамаётганлар кўп, афсуски.

2016 йилгача профессор-ўқитувчиларнинг ойлик маоши 1,5 миллион сўм атрофида эди. Ҳозир ўн баробар ошди. Бу ўз-ўзидан бўлаётгани йўқ. Мамлакатимиз раҳбари илм учун, зиёлилар учун шароит, имконият, маблағ топиб бераётганининг шарофати бу. Лекин зиёлилар ҳар доим ҳам шунга яраша иш юритишмаяпти. Ўзбек профессорининг ватанпарварлиги жадид боболаримизники даражасигача кўтарилолмаяпти...

– Тўғри айтдингиз, давлатимиз раҳбари деярли ҳар бир йиғилишда илм-маърифатга урғу берапти. Масъуллар олдиға ечимини кутаётган долзарб масалаларни қўйяпти. Зеро, бизни фақат илм-маърифат юксакликка олиб чиқади. Шундай экан, олдимизда турган машаққатларни сабот билан енгиб, мақсад сари дадил қадам ташлашимиз керак. Бу йўлда сиз каби жонкуяр устозларга куч-қувват тилаймиз.

Хусан ЭРМАТОВ
сўхбатлашди



Британиядан Украинага кўмак

Лондон 2026 йилнинг апрелига қадар Украинага 100 мингта учувчисиз бошқариладиган қурилма (дрон) етказиб бериш ниятида эканини маълум қилди. Бу ҳозир етказиб берилаётган ҳажмдан ўн баравар кўп. Бу ҳақда «Reuters» агентлиги хабар қилди.

Ушбу ташаббуснинг умумий бюджети 350 миллион фунт стерлингни (473 миллион АҚШ доллари) ташкил қилиб, Киевга ажратилган 4,5 миллиард фунт стерлинг (6 миллиард АҚШ доллари)га баҳоланаётган кенг қамровли ҳарбий ёрдам пакетининг бир қисми ҳисобланади.

«Reuters»нинг маълумотига кўра, 2024 йил январидан буён Буюк Британия Украинага 140 минг дона артиллерия снарядини етказиб берган ва қўшимча равишда украин ҳарбийларини тайёрлаш учун яна 247 миллион фунт стерлинг (334 миллион АҚШ доллари) ажратишни режалаштирган.

Россияга қарши янги санкциялар

АҚШ Сенати Россияга қарши янги санкциялар пакетини қабул қилишга тайёрланмоқда. Бу ҳақда президент Дональд Трампнинг махсус вакили Кит Келлог «Fox News» телеканалига берган интервьюсида маълум қилди.

«Мен ўтган ҳафта охирида сенатор Линдси Грэм билан суҳбатлашдим. Сенаторлар ҳаракатни бошлашга тайёр. Улар буни «2025 йил учун Россияга қарши санкциялар тўғрисидаги қонун» деб атаяпти», деди Келлог.

Унинг таъкидлашича, янги чекловлар жуда кескин бўлади ва Конгресснинг Москвага нисбатан иқтисодий ҳамда сиёсий босимни кучайтириш борасидаги қатъиятини фойдалайди.

Трамп Техронга ультиматум қўйди

АҚШ президенти Дональд Трамп маъмурияти «махфий келишув» ҳақидаги миш-мишларга қарамай, Эронга нисбатан ўз қатъий позициясидан чекинмоқчи эмас. Бу ҳақда АҚШ Давлат департаментининг расмий вакили Тэмми Брюс Вашингтондаги брифингда маълум қилди.

«Эронга нисбатан «максимал босим» кампанияси ҳамон ўз кучида», деди Брюс.

Унинг таъкидлашича, АҚШ томони илгари сурган Эроннинг урани бойиш ҳуқуқини тўлиқ чеклаш ўзгармас ва қайта қўриб чиқилмайдиган талабдир.

Оқ уй матбуот котиби Каролин Левитт эса АҚШ Эронга ядровий дастур

юзасидан «батафсил ва қабул қилса бўладиган» таклиф юборганини баён қилди. Ушбу ҳужжат Яқин Шарқ бўйича махсус вакил Стивен Уиткофф орқали етказилган.

«Президент Эрон ушбу таклифни қабул қилади, деган умидда. Акс ҳолда, оқибатлар жуда жиддий бўлади», дея огоҳлантирди Левитт.

Жанубий Кореяда муҳолифат ғалабаси

Жанубий Кореяда ўтказилган навбатдан ташқари президентлик сайловларида муҳолифатдаги Демократик партия номзоди Ли Чжэ Мён ғалаба қозонди. «Yonhap» агентлиги маълумотларига кўра, овозларнинг 100 фоизи қайта ишланганидан сўнг, Лининг 49,42 фоиз овоз олгани маълум бўлди.

Унинг асосий рақиби – консерватив «Халқ кудрати» партияси номзоди Ким Мун Су 41,15 фоиз овоз тўплаб, сайлов куниёқ мағлубиятни тан олди. У ўз тарафдорларига миннатдорлик билдирди ва Ли Чжэ Мённи ғалаба билан табриклади.

Сайловлар Жанубий Корея Конституциявий суди амалдаги президент Юн

Сок Ёлга нисбатан импичмент қарорини маъқуллаганидан сўнг тайинланган эди. Давлатни вақтинча бош вазир Хан Док Су бошқариб турди. Ли Чжэ Мённинг ғалабаси мамлакат сиёсий йўналишида ижтимоий ва минтақавий мувозанат устуворлик қиладиган янги кун тартиби бошланишидан далолат бериши мумкин.

Атамбаев учун қамоқ жазоси

Қирғизистон собиқ президенти Алмазбек Атамбаев 11 йил 3 ой муддатга озодликдан маҳрум этилиб, мол-мулки мусодара қилинди. Бу ҳақда Бишкекнинг Биринчи Май тумани судида якунланган суд жараёни натижалари асосида эълон қилинди.

Суд қарорига кўра, Атамбаев барча давлат мукофотларидан ҳам маҳрум қилинди. Шунингдек, у ва ушбу иш бўйича яна бир фигурант – собиқ бош вазир Аскарбек Шадиевдан 5 миллиард 439 миллион сом ундирилиши белгилаб қўйилди.

Айбловлар Бишкек ИЭС модернизациясида ноқонуний бойиш, 2019 йил август ойда Куй-Тош қишлоғидаги оммавий тартибсизликлар, шу жойдаги ер участкаларини ноқонуний йўл билан олиш каби бир нечта эпизодни қамраб олган.

Бирлаштирилган иш доирасида суд-

Оламгир ОТАЁРОВ тайёрлади

ЖИЗЗАХНИНГ ТУРИЗМ ЖОЗИБАСИ

Юртимизнинг ўзига хос табиати, тарихий ва меъморий обидалари хорижлик сайёҳларни азалдан мафтун этиб келган. Жумладан, Жиззах вилоятида жойлашган сўлим гўшалар ҳам туристлар оқими кўпайишига муносиб ҳисса қўшмоқда.

РАҚАМЛАР ТИЛГА КИРГАНДА

Ўтган йили вилоятга 500 минг нафар хорижий, 2 миллионга яқин маҳаллий сайёҳ келди. Бу 75 миллион АҚШ доллари миқдоридagi даромад деганидир.

Маълумотларга кўра, 2025 йилнинг биринчи чорагида вилоятга Россия, Хитой, Корея Республикаси, Ҳиндистон, Германия, Франция, Туркия, Испания, Италия, Буюк Британия, Қозоғистон, Қирғизистон ва Тожикистондан жами 129 минг 320 нафар сайёҳ ташриф буюрган. Шунингдек, Сирдарё, Самарқанд, Навоий, Бухоро, Қашқадарё, Фарғона, Наманган, Андижон, Хоразм вилоятлари ҳамда Қорақалпоғистон Республикасидан 617 минг нафар маҳаллий аҳоли саёҳатга келишган. Даромад эса 19 миллион 300 минг АҚШ долларини ташкил этган.

ФОРИШГА ХОРИЖЛИКЛАР ҲАМ КЕЛИШАДИ

Фориш туманидаги Нурота тоғ этақларида жойлашган «Ўхум» МФЙ ҳудудидаги Асраф, Мажмур, Ҳаёт каби қишлоқлар бетақорор гўзаллиги билан машҳур. Бу ердаги биологик хилма-хиллик ҳар қандай кишини ўзига ром этиши аниқ.

Шу ерлик Нарзулло Мусаев 2016 йили икки хонали меҳмон уйи очди. Соҳанинг сир-асрорларини пухта эгналш мақсадида кўп изланди. Семинарларда қатнашиб, туристларга хизмат кўрсатиш бўйича малака оширди. Инглиз ва рус тилларини ўрганди.

– Меҳмонхонамизга келаётганларнинг асосий қисми хорижликлар, – дейди Нарзулло Мусаев. – Уларни нафақат қишлоғимизнинг бетақорор табиати, балки халқимизнинг анъана-ю урф-одатлари,



миллий таомлари, турмуш тарзи ҳам жуда қизиқтиряпти. Шу боис миллийликка алоҳида эътибор қараяптимиз.

Давлатимиз раҳбари Шавкат Мирзиёев 2022 йил 27 январда «Хизматлар соҳасини ривожлантиришга оид қўшимча чора-тадбирлар тўғрисида»ги қарорни имзолаганди. Натижада тадбиркорларга қатор имкониятлар берилди. Н.Мусаев ҳам улардан унумли фойдаланиб, банкдан имтиёзли шартларда кредит олди. Уй меҳмонхонасини қайта қуриб, жиҳозлади.

ТУРИЗМ МАҲАЛЛАСИ ЯНА БИТТАГА КЎПАЙДИ

Ғаллаорол туманидаги «Узунбўлоқ» МФЙга «Туризм маҳалласи» мақоми берилгач, сайёҳлар оқими ҳисобга олиниб, 3,1 километрик йўл асфальтланди. 75 километрик ички йўлга шағал эتكъизилди. Шунингдек, махсус белгилар ўрнатилди.

– Маҳалламизга бундай мақом берилгани ҳаммамизни бирдек қувонтирди, – дейди «Узунбўлоқ» МФЙ раиси Мақсуд Бовобоев. – Ҳудудимизда 1 минг 85 та хонадон бор. Уларда 6 минг 275 на-

фар фуқаро истиқомат қилади. Охириги йиллардаги саёҳ-ҳаркатлар натижасида сайёҳлар сони бироз ошди. Айни пайтда қишлоғимизда 10 дан ортқққ лавий меҳмон уйи, 5 та оёқатланиш шохобчаси, 2 та селфи маскани, 3 та савдо маркази фаолият юритмоқда. Саад ибн Абу Ваққос зиёратгоҳи ҳам шу ерда.

– Юртингизга иккинчи марта келишим, – дейди германиялик сайёҳ Штефан Ҳоймам. – Саёҳат мобайнида Бухоро, Самарқанд шаҳарларида ҳам бўлдим. Менга миллий анъаналарингиз, айниқса, фольклор қўшиқларингиз жуда ёқди. Одамлар жуда хушчақчақ, меҳмондўст экан. Ўзбекистонни дунё таниётганидан хурсандимиз. Бу ерга келишдан доим мамнунимиз.

Ҳа, туризм соҳасини ривожлантириш учун вилоятда ҳамма имкониятлар ва шарт-шароитлар етарли. Айниқса, Бахмал ва Зоминнинг сўлим, бетақорор табиатини таърифлашга тил охиш.

Муқимбой ИСМОИЛОВ
«ISHONCH»

24 СОАТ ОНЛАЙН

ёхуд вақтимизни қандай сарфлаяпмиз?



Биринчи навбатда, улар вақт бебаҳо бойлик экани ва ундан унумли фойдаланиш кераклигини жуда яхши англаб етишган. Доим қисқа муддатда кўп ишларга улгуриш лозимлиги ҳақида уйлашган. Ўша пайт вақтингиз баракоти ҳам бошқача бўлган. Билим олиш ва уни бошқаларга улашишга доим шо-шишган. Эътибор қаратадиган асосий нарса илм бўлган. Чунки билим билан ҳар қандай нарсага эришиш мумкинлигини тушунишган.

Ҳозир-чи? Бугун вақтимизни олувчи, унга ҳукм ўтказувчи омиллар жуда кўп. Телефон, гаджетлар ва интернет. Уларнинг тўрига шу қадар мустаҳкам илиндики, ҳатто энди ундан ўзимизни қутқариш пазим топмаяпмиз. Дўстлар, яқинларимиздан кўра, интернетдаги хабарлар, бошқаларнинг ҳаёти мўҳимдек гўё.

Ҳолбуки, вақт инсон учун олий неъмат. Уни ижтимоий тармоқларга сарфлаш умрни шунчаки беҳудага ўтказишдир. Айниқса, бу кайфиятимиз, соғ-

лигимизга ҳам таъсир ўтказмай қолмаяпти. Short video (рэ-эпс)лар инсонлар тоқатсиз бўлиб қолишига сабаб бўляпти. Бу ҳолатнинг олдини олиш замон талабига айланиб боряпти. Негаки, интернетдан фойдаланаётганларнинг аксарияти ёш авлод. Кузатпасизми, ҳозирги болалар, кичкинтойлар жуда ҳам жиззаки. Сал нарсага жаҳл қиқади, аразлайди, қайсарлик қилади. Буларнинг барчаси уларнинг қўлига тутқазил-диган телефонлардаги зарарли контентлар ва кўп вақт ундан фойдаланиш натижаси эканини яхши биламиз.

Ўйлайманки, буни назоратга олса бўлади? Ҳўш, қандай қилиб? Ота-оналар болам жим бўлсин, ишимни қилиб олай, хархаша қилмасин, дея уларнинг митти қўлчасига телефон тутқазмаслиги, ўйинларга қизиқишини кўп қўллаб-қувватла-маслиги, асосийси, вақтини китоб ва мулоқот билан боғлашга ундаши лозимдир.

Мадинабону ИСРОИЛОВА,
Ўзбекистон Журналистика ва оммавий коммуникациялар университети 3-курс талабаси

Мароқли дам олинг,
азиз газетхон!



Юлдуз ТУРДИЕВА
ижросида
«ОНА, МЕН
КЕЛДИМ,
ДЕГИН»
қўшиғи

Болам, келсанг, қай маҳал,
Кўзим йўлингга маҳтал,
Қошимга келиб ҳар гал,
Она, мен келдим, дегин.

Мунаввара УСМОНОВА шеъри

MUASSIS:



2007-йил 11-январда
O'zbekiston Matbuot
va axborot agentligida
116-raqam bilan
ro'yxatga olingan.

«Ishonch» va «Ishonch-Доверие»
gazetalari tahrir hay'ati:

Qudratilla RAFIQOV
(tahrir hay'ati raisi),
Ulug'bek JALMENOVI, Anvar ABDUMUXTOROV,
Sayfullo AHMEDOV, Akmal SAIDOV, Ravshan BEDILOV,
Qutlimurot SOBIROV, Suhrob RAFIQOV, Shoqosim SHOISLOMOV,
Hamidulla PIRIMQULOV, Nodira G'OYIBNAZAROVA,
Anvar QULMURODOV (Bosh muharrirning birinchi o'rinbosari),
Mehridin SHUKUROV (Mas'ul kotib – «Ishonchi»),
Valentina MARSENYAK (Mas'ul kotib – «Ishonch-Доверие»)

Bosh muharrir
Husan ERMATOV

«Ishonch»dan olingan ma'lumotlarda manba sifatida gazeta nomi ko'rsatilishi shart.
Mualliflar fikri tahririyat nuqtai nazaridan farqlanishi mumkin.

Bo'limlar:

Kasaba uyushmalari hayoti – (71) 256-64-69
Huquq va xalqaro hayot – (71) 256-52-89
Milliy-ma'naviy qadriyatlar va sport – (71) 256-82-79
Xatlar va muxbirlar bilan ishlash – (71) 256-85-43
Marketing va obuna – (71) 256-87-73

Hududlardagi muxbirlar:

Qoraqalpog'iston Respublikasi – (+998-99) 889-98-20
Andijon viloyati – (+998-99) 889-90-23
Buxoro viloyati – (+998-99) 889-90-31
Navoiy viloyati – (+998-99) 500-05-12
Jizzax viloyati – (+998-99) 889-90-34
Namangan viloyati – (+998-93) 213-09-66
Samarqand viloyati – (+998-99) 889-90-26
Sirdaryo viloyati – (+998-99) 889-98-55
Surxondaryo viloyati – (+998-99) 379-19-70
Toshkent viloyati – (+998-99) 600-40-44
Farg'ona viloyati – (+998-99) 889-90-24
Xorazm viloyati – (+998-99) 889-98-01
Qashqadaryo viloyati – (+998-97) 705-08-93

Navbatchi muharrir:

Alijon ABDURAHMONOV
Musahhihlar:
Dilorom XUDOYBERGANOVA,
Umida XUDOYBERGANOVA
Sahifalovchi:
Hasan ABDULLILOV
Boisiga topshirish vaqti – 23:40
Topshirishi – 00:10
Bahosi kelishilgan narxda
Gazeta haftaning seshanba, payshanba va shanba kunlari chiqadi.
Gazeta «Ishonch»ning kompyuter markazida teriladi va sahifalandi.

Manzilimiz:

100165, Toshkent shahri,
Buxoro ko'chasi, 24-uy.
E-mail: ishonch
1991@yandex.uz

Nashr ko'rsatkichi: 133

Gazetaning poligrafik jihatdan sifati chop etilishiga boshmaxona mas'ul. Gazetaning yetkazib berilishi uchun obunani rasmiylashtirgan tashkilot javobgar.

Umumiy adadi 32 408 ta

Shundan: 6 187 nusxasi
«Sharq» nashriyot-matbaa aksiyadorlik kompaniyasi boshmaxonasi –
Toshkent shahri, Buyuk Turon ko'chasi, 41-uyda;

18 306 nusxasi

«Erudit» MCHJ boshmaxonasi –
Samarqand shahri, Spitamen ko'chasi, 270-uyda;

7 915 nusxasi

«Poligraf-Press» MCHJ boshmaxonasi –
Marg'ilon shahri, Turkiston ko'chasi,
236-«b» uyda chop etildi.

Gazeta ofset usulida, A-2 formatida bosildi.
Hajmi 2 bosma tabaq. Buyurtma G-611

1 2 3 4 5 6